

Saqqummiussissut - Kalaallit Nunaanni inuussutissarsiornermut suliassat angisoorsuit piviusunngortinnejarnissaannut atugassarititaasusanut killissaliussat pillugit nassuaat.

(Inuussutissarsiornermut Aatsitassanullu Naalakkersuisoq)

Saqqummiussissut

(Inuussutissarsiornermut Aatsitassanullu Naalakkersuisoq)

Naalakkersuisut sinnerlugit matumuuna Kalaallit Nunaanni inuussutissarsiornermut suliassat angisoorsuit piviusunngortinnejarnissaannut atugassarititaasusanut killissaliussat pillugit nassuaat Inatsisartuni oqaluuserineqartussanngorlugu saqqummiutissavara.

Inuussutissarsiornermi suliassanik angisoorsuarnik – aatsitassarsiorfinnik aamma suliffissuaqarnikkut suliassanik erngup nukinganit isumalluutitsinnik atuinermik aallaaveqartunik – arlapinnik pilersitsinissaq, nunatta aningaasaqarnikkut imminut napatissinnaalernissaata tungaanut ineriartortitsinermut pingaaruteqartumik iluaqutaassasoq Naalakkersuisut isumaqarput. Pissutsit tamakku erseqqissaassutigineqassapput 2012-imik ukiamut ataatsimiinnissap tungaanut nalilersuiffigineqassallutik soqutigisaqartut oqartussaatitaqartullu.

Nassuaammi sulisussanik avataaneersunik atorfinititsinissaq pillugu apeqqut, tassungalu ilanngullugu taamatut atorfinititsinissaq, atugassarititaasut kinaassusersiunngitsumik tunngavilersugaasut tunngavigalugit aammalu Kalaallit Nunaata inuit pisinnaatitaaffiinut, sulinermi pissutsinut assigisaannullu tunngatillugu nunani tamalaani pisussaaffii ataqqillugit, qanoq iliornikkut qualkkeerneqarsinnaanersoq, pingarnertut sammineqartut ilagaat.

Nassuaammi aallaavagineqarpoq ingerlatsinerup immikkoortuani sulisitsineq aningaasarsiatigut sulinermilu atugassarititaasut nalinginnaasut tunngavigalugit pissasoq tunngavigineqassasoq, taamatullu IBA-nut isumaqatigiissutit, suliassani kalaallit inuussutissarsiorrut sapinngisamik annertunerpaamik peqataanissaannik aammalu nunaqvassisut sapinngisamik annertunerpaamik suliffissaqartinnejarnissaannik qualkkeerisussat, suliassani ilaatinneqartassasut.

Nassuaammi suliassaqarfuit inuussutissarsiornermi suliassat angisoorsuit piviusunngortinnejarnissaannut maannakkorpiaq akimmiffiusartut tikkuarneqarput, aammalu aaqqiissutissatut siunnersuutit arlallit tikkuarneqarlutik, taakkunannilu nutaanik inatsisiliornissamik pisariaqartitsinerit ilaapput. Suliassaqarfuit arlallit, assersuutigalugu avatangiisirut, pinngortitamut eqqissimatisinermullu inatsisit, inuussutissarsiornermi suliassat angisoorsuit piviusunngortinnejarnissaannut immikkut akimmiffiusartutut isigineqanngillat, taamaattumillu nassuaammi taakkua immikkut sammineqaratik.

Inuussutissarsiornermi suliassanik angisoorsuarnik pilersitsisoqassappat sanaartornerup immikkoortuani avataaniit sulisoqarnissaq pisariaqarpoq. Kalaallit Nunaanni suliffeqarnermit sulisussat pisariaqartinneqartut pissarsiarineqarsinnaanggillat. Amerlassutsit piginnaanerillu tassani pineqarput. Aningaasaliisut tungaannii tulisussat avataaneersut taakkua nunani tamalaani aningaasarsiatigut sulinermilu atugassarititaasut tunngavigalugit atorfinitssinneqassasut kissaatigineqarpoq. Taamaaliornikkut sanaartugassanut aningaasaliissutissat ikinnerulissapput taamaalillunilu suliassat imminnut akilersinnaanerulissallutik.

Naalakkersuisut isumaqarput apeqqummut tassunga aaqqiissutissarsisoqartariaqartoq, taamaaliortoqanngippat inuussutissarsiornermi suliassat angisoorsuit piviusunngortinneqarsinnaanavianngimmata.

Naalakkersuisunut aalajangiisuulluinnartumik pingaaruteqarpoq, nunani tamalaani aningaasarsiatigut sulinermilu atugassarititaasut taakkua, suliassat angisoorsuit sanaartornermut immikkoortuanut atatillugu neqeroorutigineqartussat, akuersarneqarsinnaasuussasut naapertuuttuussallutillu. Inooqataanermi appasinnerusutut inisisimatisinissaq Naalakkersuisut akuersaarnianngilaat.

Nassuaammi siunertaavoq inatsisinik piareersaalluni sulinerup ingerlaqqinnissaanut kiisalu UKA 2012-imi aalajangiinissamut tunngavissat aalajangersimanerusut inaarsarneqarnissaannut Inatsisartunit immersorneqarnissaq.

Nunatsinni maani inuussutissarsiornermi suliassat angisoorsuit piviusunngortinneqarsinnaanissaannut periarfisanut naleqqiullugu, sulisoqartarnermut ingerlatsinissamullu akuersissutinut aalajangersakkanut tunngatillugu killissaliussassanut piumasaqaataasussanut siunnersummik aalajangersimasumik saqqummiussisinnaanissaq siunertalarugu, ullumikkut oqallinneq aallaavigalugu suliaqarneq Naalakkersuisut ingerlateqqissamaarpaat. Tassunga atatillugu, suliassat piviusunngortinneqarnissaannut atugassarititaasunut killissaliussanik aalajangersaanerup Kalaallit Nunaannut qanoq sunniuteqarnissaa sapinngisamik ersarinnerpaamik paasinarsisinniarlugu, aningaasaliuumasinnaasunik arlalinnik suli annertunerusumik oqaloqateqarnissaq pariaqartinneqarpoq.

Naalakkersuisut matumuuna nassuaatip oqallisigineqarnissaa inassutigaat.